

èxtra

ARUBA

Segun Tico Croes

PAISNAN CHIQUITO INDEPENDIENTE TA MUCHO VULNERABEL

ORANJESTAD (APA) E experto di AVP riba terreno internacional, Lic. Tico Croes, tambe ta un di e personanan cu a traha riba e nota di AVP. Un punto interesante cu Tico Croes a mencioná durante e conferencia di prensa ta e vulnerabilidad di un isla chiquito manera Aruba den un

estado independiente, riba papel, pa cu e mundo exterior.

E team di AVP a haci un investigacion di cual ta e ultimo desaroyonan riba terreno internacional, specialmente loka ta toca e paisnan chiquito. Un preocupacion grandi cu tin rond mundo ta e

vulnerabilidad di paisnan chiquito. Na 1982 p.e. tabata tin e crisis di Falkland. Un pais asina chiquito, cu poco poblacion, por a causa un problema internacional asina grandi cu a pone paisnan latinoamericano den un conflicto serio cu paisnan europeo, pero cu despues tambe a pone e problematica di alianza den NATO. E pensamiento di vulnerabilidad a worde ractificá cu e crisis di Granada na 1983 unda cu Merca y Inglatera diametralmente tabata di opinionnan diferente. Aki un isla di apenas 100 mil hende a causa preocupacionnan riba terreno internacional.

Tur e ariba mencioná a haci cu a cuminsa cu estudionan riba e terreno aki. Poco poco e actitud di nacionnan grandi cu paisnan cu kier autodeterminacion mester caba den un independencia, a cuminsa cambia. E incidente di Falklands, Grenada y despues esun di Suriname, a pone cu definitiva-

mente cu e pensamiento internacional awor aki nan ta pa mira e problematica di e paisnan chiquito for di un otro angulo. Asina p.e. pa promer biaha Inglatera den un forma bon cla a bisa na 1987 cu mirando e problema di penetracion di Kartel di Medellin na den e

islanan aki, a pone nan preocupacion. Relacioná cu esaki Gran Bretaña a informá Nacionnan Uni cu nan lo no urgí mas pa e paisnan chiquito bira independiente. Mirando e vulnerabilidad di e paisnan chiquito, nan lo prefera di mantene lasonan special cu e islanan.